

O LE SULU SAMOA



EKALESI FAAPOTOPOTOGA KERISIANO SAMOA
O LE NUSIPEPA FAA-LE-LOTU NA FAAVAEINA I LE T.A. 1839



FAAVAEINA 1839

O LE SULU SAMOA

SETEMA 2018

email: sulusamoa@cccs.org.ws -Main Office: Ph. 24414, Ext 30 - website: www.cccs.org.ws

O le Asima'i a Simi i le Malumalu

O le tala lenei i se faifeau na ia lipotia mai se toeaina lavalava masaesae ma ve'uve'ua lona ulu
silasila itulau e 7

Ua Fiu e Sasa le Asini e le Usita'i

silasila itulau e 6

Rosa Mumu mo La'u Manamea

O se tala mo Tupulaga Talavou

Tele masina o ma finau pea lava pea ma lo'u to'alua i lona mana'o e fia sa'oloto e na te faia nisi mea poo se galuega aua le atiinae o lo
faaauau itulau e 6

Kerisiano Sauaina i le Lalolagi

(AD 2000 - Today)

O le matafaga oneone o loo tootuli ai ni tamaloloa se to'a 21, e oofu uma i ofu lanumoli, (o ofu e masani ona fai pe a faasala i le oti), ma punonou, a o tutu i o latou luga, ni tagata e le lotu Kerisiano, e tofu i latou ma le pelu, a o tua atu o
silasila itulau e 11

Ia Outou Talia le Agaga Paia

Pepa mo le Fono Tele saunia e Tupulaga Talavou Hawaii

ALOHA! TALOFA! E faafeiloai atu Tupulaga Hawaii i le Fono Tele o le 2018. Malo le usufono. Malo foi le onosa'i.

Faafetai ua matou maua lenei

avanoa faa-auro e fai ai ma sui o Tupulaga o le Ekalesia. Ua matou filifilia le tusi faitau ma le autu o le aso lenei i le Tusi Faitau Aso:

faaauau itulau e 2



Sui o le Laulau a le Fono Tele Susuga Tautiaga Senala FT, (Taitaifono), Susuga Tunumoso Iosia Soliola (Sui Taitaifono), Susuga Vavatau Taufao FS, (Failautusi Aoao), Susuga Rimoni Wright FS (Teutupe) i le feiloaiga ma sui o le Faalapotopotoga o le Faamama Toto (Kidney Foudation) mo le tauaaoina o le \$50,000.

\$50,000 mo le Faamama Toto

O le Aso Gafua aso 3 o le masina nei, na fai ai se sauniga puupuu i le Ofisa Tutotonu o le Ekalesia Faapotopotoga Kerisiano Samoa, EFKS i le Ioane Viliamu, mo le tau'a'aoina atu i sui o le Matagaluega o le Soifua Maloloina, po o le Kydney Foundation, le tupe

e \$50,000 Tala, o le fesoasoani masani a le Ekalesia mo galuega o feagai ai ma le Faalapotopotoga, i le togafitiga o gasegase fatuga'o o le mamalu o le atunuu e maua i lea gasegase. Sa auai le Afioga i le Taitaifono o le Ekalesia Susuga
faaauau itulau e 10

Ia Outou Talia le Agaga Paia

mai le itulau muamua

“Auina atu e le Agaga - Spirit Sending.” Ona ua matou lagona ua mafa totoga le Fono Tele i lona autu i e na muamua mai lenei vaiaso. Peitai fai mai le upu faa-Peretania: Last, but not least - A faa-Samoaina: E mulia’i, ae sili atu lona taua.

Tusi Faitau: Ioane 20:19-23: Ua oo i le afiafi o lona aso, o le uluai aso lea o le vaisapati, ua punitia faitotoa o le mea na potopoto ai le ausoo, ona o le fefe ia Iutaia; ua maliu atu Iesu, ua tu i totonu; ona fetalai atu lea o ia ia te i latou: “Ia outou manuia.” Ua ia fetalai atu lea mea, ona faaali atu lea ia te i latou o ona lima ma lona itu. Ona olioli ai lea o le ausoo ina ua latou vaai atu i le Alii. Ona toe fetalai atu lea o Iesu ia te i latou: “Ia outou manuia. Faapei ona auina mai o a’u e le Tama, e faapea foi ona ou auina atu outou.” Ua ia fetalai atu lea mea, ona manava atu lea o ia ia te i latou ma faapea atu, “Ia outou talia le Agaga Paia. O i latou uma lava tou te faamagaloina ai a latou agasala, e faamagaloina ia ia i latou; o i latou uma lava tou te tuu pea iai a latou agasala, e tuu pea lava ia.”

Manatu 1: “...ua punitia faitotoa o le mea na potopoto ai le ausoo, ona o le fefe ia Iutaia.”

O le tala a Ioane e uiga i le Aso o le Toetu, ua ta’ua ai uiga nei o le ausoo. O le faailoga o le fememea’i aua ua leai so latou ta’ita’i, ma le le mautonu i lenei tala ua aumai e uiga i lona toetu. ‘Ai lava sa iai ni o latou lagona, o le a faapefea nei ona latou toe faafesaga’i ma Iesu? O le a sa latou tala o le a fai atu, aua na latou sosola ‘ae tuua o ia e faasatauroina? A tupu le fefe ma le pala’ai i le tagata, ua le iloa foi ni upu e gagana ai, ma taumafai loa ina ia lafi lilo. E taua tele le gagana

tautala: e fesoota’i ai i tatou o le tasi i le isi; ma faaleoina ai manatu ma mafauauga loloto. O le gagana Samoa lea ua mafai ai e le Ekalesia ona maopoopo, ma mautu ana galuega fai mo le Tala Lelei ma le aga’i atu i le lumana’i. Peitai, o la tatou gagana foi lona, ua peisea’i ua fai ma ala ua matou fefefe ai. O le tele o taimi ua matou lalafi ai ona o le pala’a’ai i le Ekalesia. E iai pea le mitamitaga, o i matou o tagata Samoa, aua o lo tatou tofi faatasi lona mai le Atua. Ae paga lea, ua vaivai-a-lima i matou i la tatou gagana.

E manaia se tala nai le Sulu Samoa, i le masina o Tesema 2017. O se finauga a Tupulaga Talavou e faatatau i le ulutala: “Ua tele le mativa ona o mea e fai a nuu ma Ekalesia.” O susuga ia Renny Utufua Naseri, Eleitino Tiitii ma Simeanamulu Lalotoa Fiti, o le Aulavou EFKS Apia, na latou matua tetee i lea mata’upu. Ae na ta’ua i le saunoaga a Renny, e faapea: “E tele ituaiga mativa. E iai le mativa i le tamaoaiga faaletino, e iai le mativa faaleagaga. Ae iai foi isi ituaiga mativa....” (itulau 2, Sulu Samoa, Tesema 2017). A ua matou fia faaopoopo i lea saunoaga taua, se manatu - E iai ma le mativa i le gagana. Ua matou lagonaina, o le le atoatoa o le tautua a Tupulaga i le Atua e ala i le Ekalesia, ona ua matitiva i le gagana. Atonu o le mafuaaga foi lona ua fefefe ai, ma pala’a’ai Tupulaga i le Ekalesia, ma ua avea ma ala ua o ese ai nisi. A malamalama se tagata ma atoatoa i le gagana, e maua le to’afilemu ma le lototele e tautala atu ai, ma faafesaga’i pea ma tagata.

Manatu 2: “...ona faaali atu lea ia te i latou o ona lima ma lona itu. Ona olioli ai lea o le ausoo ina ua latou vaai atu i le Alii.”

O loo manino lelei iinei le suiga o uiga o le ausoo, mai le fefe ma le pala’ai i le olioli. Ua tafi’esea e le Alii Toetu lagona vaivai o le tagata, ma ua toe faafo’isia le malosi i lona ausoo. O ona ‘a’ao mafola ua tutu’i ai fao, ma lona itu sa afaina i le ma’ai o le tao, lea ua vaai tino iai le ausoo, ona tupu ai lea o lo latou olioli.

O le taunuu mai o le Tala Lelei i lo tatou atunuu, o se tulaga e ofo ai le mafauau. Aua e ui o misionare papalagi na latou tala’i maia, a o nai tua’a lava ma matua ua mou atu lo latou soifua, na auala mai ai le Tala Lelei, ma ua faigofie ai ona taliaina e o tatou tagata. Atonu o le Agaga o le Atua lona, ua ia faaogaina ai nai o tatou tagata, faatasi ai ma le gagana e molimoli mai ai le Tala Lelei i Samoa. O ‘a’ao mafola ia o Iesu ua ia faailoa mai ai le itu lelei o le Tala Lelei, o lea ua tatou fiafia faatasi ai. Ae sa le faigofie le faatinoga o lenei Tala Lelei, ma le Faaolataga mo lanu ma gagana uma o le lalolagi. Ina ua mautu mai le Tala Lelei i Samoa, ona a’e lea o se tofa i o tatou tagata, ina ia faasalafa, ma faasoa atu lenei tala i le Atua Pasefika. A o le isi lenei mea e ofo ai, aua o lo latou ma’elega ma le atamai i le faaogaina o le gagana sa faia ai le tala’iga. I le Fono Tele o le 2017, sa folasia ai e le Faia’oga o le Kolisi Faafaifeau i Malua nei, le Susuga ia Latu Latai, se talaaga matagofie i le Galuega Faamisionare, a Faifeau ma Faletua LMS Samoa i le Pasefika. O se tala i le ‘a’ao mafola o o tatou tagata, i le ofoina atu o le soifua mo le Atua ma lana Tala Lelei. ‘Ai lava sa foliga faigofie ia i latou, le ofoina atu o le soifua e tautuaina ai le Atua ma lona finagalo. A o le upu moni, sa le faigofie lona faatinoga. Aua o le toatele o nai tua’a ma matua,

faaauau itulau e 9

O LE LAUGA

Lauga Aso Sa 21 Me 2017 Fono Tele Malua Sauniga Taeao

Feagaiga Tuai: 1 Samuelu 15: 20 – 23
Feagaiga Fou: Faaaliga 1: 8 – 16
Matua – Faaaliga 1: 10

E agai lava se mafaufauga i le Taiala o lenei Aso.

“Faalogo i le Agaga o le Atua”

Faalogo i le siufofoga o le Alii ua lagona i o tatou loto. Mulimuli i le Atua – auā o le Agaga o ia. Afai e faalogo i le Agaga Paia, o le a se taua i le tagata, o le a se taua i le failauga ma auauna a le Atua? A o le a foi se aoga mo le Ekalesia ma lana galuega talai.

Sei o tatou toe tepa lava i tua. I uluai tupu na filifilia e le Atua i lana galuega. E a le faalogo a le tupu o Saulo?

O le Tala Masani

Pei lava ona fetalai le Atua ia Saulo – Alu e faaumatia Amaleka. (mea uma) o tagata atoa ma manu. O le a le mea na faia e Saulo? Maoa’e le sese le faalogo. Aemaise le faatonuga a le Agaga o le Atua. Faaumatia le aai atoa. O le Tapasa Taua lea e tatau ona usitai i ai lona ola auauna. “O LE ATUA” O fea lava e aumai i ai le faasinoga ma le taitaiga a le Agaga o le Atua, ia alu lava ma le faalologo. Alu ma le usiusitai. A o ai se isi e toe sili? O ai se tasi e toe faalogo iai, lea ua malele mai le siufofoga o le Atua. Ma avatu le taiala taua o lana galuega. “Faalogo i le Agaga o le Atua.”

Ae talofa “Ua leai,” Sese le faalogo – Ua naunau i le ga’o ma le lololo o mamoe po’a, tuinanau le loto i le pepeti ma tino lelei o manu. A ua pepelo ai i le Atua, o

manu e osi ai le taulaga. O se mea inosia ma se agasala matuia lea i le silafaga a le Atua.

O le a lona iuga? Saulo - o le faalogo e sili i le taulaga. O le usiusitai, e sili i le ga’o o le mamoe po’a. Afai ua e tuulafoai i la’u faatonuga, ou te tuulafoai foi ia te oe ia le toe fai oe ma tupu. E faaumatia foi oe ma lou aiga e oo i le faavavau. Oka se iuga ina matautia, se faasalaga ina ogaoga ma mamafa tu. Ua le gata ia Saulo ae faapea foi i lona aiga. Ae mafua i se a? Ua le faalogo i le Agaga o le Atua. Mafua i le ola tetee ma le pepelo i le Agaga o le Atua.

E TAUA LE FAALOGO I LE AGAGA O LE ATUA

A o feagai ma sauaga faigata ia na oo i le aposetolo o Ioane, a o fa’aaunu’ua o ia i le motu o Patamo o se motu itiiti o le malo o Take. E i le talafatai o le itu i sisifo o Asia Itiiti. E lafoai iai pagota a le malo o Roma, faasala foi iai ma le Au Kerisiano tetee i pulega a Roma. Latou te faapologa ai ma fai ai galuega mamafa. (Eli le maina i le manava o le elelee. E lamatia ma oti i taimi uma). Ua alofia ai foi ma Ioane ma au uso Kerisiano lutaia.

Fai mai le molimau a Ioane sa ia te ia le Agaga i le aso o le Alii. O lona uiga o le Aso Sa.. Ua ia faalogo i le leo tele e pei o se pu ua faapea mai: O mea e te vaaia ia e tusi i se tusi ma avatu i Ekalesia e fitu. E iai Efeso, Semurana, Perekama, Tuitira, Filatelefaia, Sarataisa ma Laotikana le galuega ua tofia ai Ioane e le Alii e alu e fai. Faalogo i le Agaga o le Atua. O le mea taua lea. O le Agaga o le Atua. Na te faasino ma taitai le tagata i galuega a le Atua. Na te

tapena le aufaigaluega faatauvaa a le Alii. E faatamaoiga e le Agaga e avatu ia Ioane le malosi foai le loto tele. ‘Aua le loto vaivai. A ia matua maua’a mausali le faatuatua e fesagai ma le agaga o faigata. O a ia sauaga ma faigata i le au Kerisiano? A lea ua tusi e Ioane ma faailoa. Efeso – ua ou iloa au galuega, ua e onosai ua e lavatia i e ua pepelo ma le au amioleaga. Ae peitai ua e lafoai lou uluai alofa i le Alii Faaola o Keriso ma ua e tetee ai ia te isa. Afai e te le salamo, o le a aveesea lou tuugamoli ma e ia te oe le toasa o le Alii. Semurana – o le aai o Tapuaiga i Emeperoa o Roma o Sunako lava o Safaira ma tapuaiga faapaupau. A tetee iai le Au Kerisiano o le oti lava lona iuga. Tusi faamalosi a Ioane. Semurana – Ia e faamalosi seia oo i le oti. Ona avatu lea ia te oe o le pale o le ola.

Laotikaia – Ua ou iloa au galuega. E te le maalili. E te le vevela. Ua e faaleogalua ua e fai mai e te mauoa e te tamaoiga, e te le mativa i se mea e tasi. A ua e le iloa, o oe ua i le faitotoa o le malaia ma tauaso ua e oti i le agasala. O sauaga ogaoga ia ma aafiaga tiga sa feagai ma isi Ekalesia e fitu. Ma iu ai lava ina susunu ola tino o nai tagata Kerisiano. A o tulai mai taitai Emeperoa Saua o Nero – Tomitiana – ioe e maoa’e sauaga, matuia ma mata’utia o le ogaoga o tiga sa feagai ma o tatou uso Kerisiano. Afai o le ogaoga ma matautia lea o sauaga, o ai se faatuatua a mausali pea? A o ai se Kerisiano e tumau pea lona faamoemoe i le Alii o Keriso? A o ai se tagata o le Atua e toe fia atia’e le galuega a le Atua pe a feagai ma faaaitauli ogaoga faapea? E leai a se tasi. O le upu moni a lea, e le toe fia galue se tasi. O ai a fia ofo le ola pe afai o le taunuuga malaia lea. Ae fai mai

faaauau itulau e 4

Tuaiti Laimeni Muti 1837-1899

DWIGHT LYMAN MOODY

O le Faifeau e le'i Faauuina Aupito Logologoa

O le 'Au Toe Faaolaola

Ina ua fo'i mai Tuaiti Muti mai lana malaga, na toe aliali a'e ai foi i le taimi lea lona loto ma'a'a ma lana amio faigata. Sa maoa'e ana tautalaga i mafutaga i le lotu, ma lona taumafai e ta'ita'i ae o loo manana'o le toatele o le aulotu e ffilemu ma faalogologo i lauga a i latou e tele atu lo latou potu masani ma malamalama i le faatuatua nai lo ia. Na oo lava ina faatonuina o ia e le 'au matutua ma tiakono e nofo ffilemu ma faalogologo i taimi o mafutaga. Ae le'i faigofie ona taofiofia Muti, ma oo ina avea ai o ia ma faafitauli i le vaai a ta'ita'i o le lotu.

Na oo foi ina faaletonu lana galuega i le pisinisi a lona 'uncle' o Samuelu Holton. Ua faigata lava

ona galulue faatasi ma isi tagata faigaluega i le faleseevae. E ui lava sa tulaga lelei ana faatau i le pisinisi, ae sa faigata tele i tagata faigaluega lona loto ma'a'a ma le le finau'ina. E le lelei lona va ma tagata faigaluega.

I ni aso mulimuli ane ona ia faaalua lea faapea i nisi o ana uo, pei lava ia o se "manu o loo tuu i se fagaomanu." O le mae'ae'a ma le tuumatamaga o mea i le siosiomaga o loo iai sa faigata ia te ia ona talia. E foliga mai ai e le o iai se avanoa mo ia. Ua ia lagona foi e laitiiti tele le aai o Boston ma taotaomia tele mo ia. A o le talitonuga o lona tina o Peti e tasi lava le togafiti e fo'ia ai faafitauli o lana tama, o le toe foi atu i le aiga,

ma na ta'ita'ia lona aiga. Peitai na talitonu Muti e sili atu ona taotaomia o ia i lona aiga nai lo le aai o Boston. Ma e na faafuase'i lava ona fai le filifiliga a Muti e siitia i Sikako, e aunoa ma le logoina o lona tina.

E lelei Sikako i le ituaiga tagata e iai Muti e fia sausu 'apa'au ma lele. E tele avanoa ma tele le aai. O le faitau aofa'i o ona tagata i le tausaga e 1850 e 29,963, ae te'a tausaga e sefulu ua sili atu i le 112,000 tagata. Na avea ma taulaga autu o vaa femalagaa'i ma nofoaafi. O se aai foi na fai ma taunuuga autu o tagata mai Europa ua gasolo mai ma nonofo ai ona o le mana'omia tele o ni tagata faigaluega mo le anoano o atiinae tetele i le aai o Sikako.

A o le mea moni, e pei lava foi o soo se isi aai fou faato'a faatuina, ua tumu i tupulaga talavou su'e galuega ua nonofo ai, ma ua mamao mai pulega e saisaitia ai faaletulafono ma le pulea lelei e o latou aiga. Ua tumu le aai i fale kalapu, fale mo fafine talitane, ma fale peletupe. Ma o le vaiaso
faaaauu itulau e 5

O LE LAUGA

mai le itulau e 3

e a le molimau a Ioane? Mea na vaai- Tusi i lalo – fai mai e a - outou o e sauaina ona o le suafa o Iesu ia faamaoni, seia oo i le oti. Ona ou avatu lea o le pale o le ola e faavavau. Iuga foi lea o le tagata e faalogo i le Agaga o le Atua. E avatu ia te ia le pale o le Ola e faavavau. (Oka) se manaia o le tau i le tagata, e sauaina ona o le Tala Lelei a Keriso.

FAAMAONI – mausali le faatuatua fai mai e a le siufofoga mai le lagi? Avatu ia te ia le pale o le Ola e faavavau. Iuga foi lea o le tagata e faalogo i le Agaga o le Atua. Avatu ia te ia le pale o le ola e faavavau. O i e lei toe solomuli ai le Au Kerisiano. Pe

feagai ma puapuaga ma le ogaoga o sauaga. Pe taunuu i le oti e le faafiti pe solomuli ai foi. Ae fia ofo le ola e oti mo le Alii. O lea foi le faasinoga ma taitaiga a le Agaga o le Atua pe ola poo le oti. E alu a ma faalologo, mulimuli lava ma usiusitai, ave le ola mo le Alii. Le Ekalesia pele i le loto ma le agaga. O a mai lau faalogo? O le a lau faamuamua i lau faafofoga? O fea o faatau i lau faalogo? Taua lea o le vaitau leni i le afio mai o le Agaga Paia. Tatou te faalologo uma iai. O fea lava o iai lana faasinoga ma lana taitaiga. Tatou te mulimuli lava ma le loto mauualo. Le agaga e toe tapue ma toe faafou lo ta ola i le agaga.

Le Agaga – o le faamafanafana fefaamagaloi. Vaitau – e toe fafagu ai le loto vaivai. E talepe – ina ia loto tele ai le faamaualuga ina ia mauualo le loto. Le agaga ina ia matua mausali, mausali le faatuatua, ua tau maluelue ma tau fetoitai. Nei o ta manatu faamaualuga e pei o Laotikaia, mitamita i le tamaoiga, tele auro tele ario, lona malosi ma saogalemu le nuu ma tagata uma. Ae fai mai e a le siufofoga mai le lagi – Ioane tusi i lalo – Laotikaia nei e manatu ma pea ane o loo e lelei, ae lele ua e tu i le faitotoa o le malaia. Ua e tauaso i la le agaga, ma ua e pogisa ma ua e oti i la le agaga. O le ta alaga faamaualuga foi lea EFKS, ta pese faamaualuga, o tatou o le ekalesia na muamua ua leva. Ua ao ai Samoa. Ekalesia

faaaauu itulau e 11

Tuaiti Laimeni Muti 1837-1899

DWIGHT LYMAN MOODY

O le Faifeau e le'i Faauuina Aupito Logologoa

O le 'Au Toe Faaolaola

mai le itulau e 4

muamua lava talu ona taunuu o Muti i Sikako, na ia sailia ai se aulotu ma se fale tapua'i, ne'i te'i ua pa'u atu i nei nofoaga o le ola le taupulea ma faiga solitulafono. Na avea lea sailiga o se aulotu ma se fale tapua'i e Muti ma faamaoniga o lona faaolaina i lo le sailiiliga na fai e tiakono ma le au matutua i Mount Vernon.

Na matauina e Muti le avea o ona talitonuga faale-lotu ma mafuaaga o le faatuina o le anoano o pisinisi i le aai - o lona faamaoni ma lona agalelei ma le alofa i tagata ua fai ma fesoasoani tele i pisinisi. Na o le lua aso talu ona taunuu i Sikako ae maua se isi ana galuega o le faatauina atu lea o seevae i le faleoloa o se isi ona 'uncle', o Holton Calvin. Ua tuu nei se matati'a tele e Muti ina ia ia ausia i ana teugatupe, o le ausia lea o le \$100,000, o se matati'a matua tele i ia aso o le na o le tasi le Tala le totogi o le tagata i le aso.

Fai mai se tasi o tagata na faafaigaluegaina Muti, "O le sini o ana taumafaiga ina ia teu ni tupe se tele na fai ma mea e matua pulea ai lona ola. Posiposi lelei ana mea ma faasaosao. O se tagata faigaluega filifiliga. Na oo ina iloa e Muti e mafai ona ia faasaoina i le vaiaso e tasi ni tupe e alu le masina o tau saili i Boston. E tele foi avanoa na maua i Sikako e fai ai aitalafu ma faatau fanua, o se tasi o pisinisi na matua manuina ai taumafaiga a Muti. E oo atu i le tausaga e 1860 ua lata i le \$12,000 lana tupe ua faasao. O se tupe matua tele lava i ia aso. Ma e ui lava i ia teuga tupe sa ia fai, ae

le'i tuua ai lona fesoasoani i lona aiga i mea tau tupe.

Ae le na o le faasaoina ma teuina o ni tupe sa mumu faaafi i lona mafaufau. O le isi mea o le faasaoina o agaga o tagata. O le talitonuga o Muti e na o Iesu lava le tali i faafitauli uma o loo gasu ai le olaga o tagata, ma o lona talitonuga foi, ua valaauina o ia e faia le fofo mo agaga uma e mafai ona ia faasaoina.

O le Nofoa Lisi a Tuaiti (Dwight's Rent-a-Pew)

Na oo ina tuua e Muti le aulotu i Mount Vernon, ae lotu i le Chicago's Plymouth Congregational Church. O ina na ia lisiina ai se nofoa i le malumalu, ona ua tuputupu a'e pea lona tamaoiga. Na te le'i faia lea mea ona ua tele ana tupe poo se fia tagata, ae ona o lona faamoemoe, o ia na te aumaia tagata e nonofo i le nofoa lea o le falesa i Aso Sa uma.

O se tusi na tusia e lona atalii o loo ta'ua ai e faapea -

Na te valaau taulele'a mai magaala, pe asiati atu foi i mea e nonofo mau totogi ai, pe na te aumai foi mai fale'ava e latou te faatumuina lona "nofoa totogi".

O le alumia o lana faiga lea na ia faaopoopo ai isi nofoa totogi i lana lisi. Ma e le'i umi se taimi ae faatumuina ana nofoa i le mau tagata eseese - o isi e le tatau ona o atu i totonu o ni falesa ona o le leaga o o latou lavalava, ae ua taena'i uma atu e Muti ina ia faaolaina.

Ua oo ina le lava le falesa e tasi mo le taumafaiga a Muti. Ma e le'i leva ae ia faaaogaina falesa e

tolu: Plymouth Congregational Church, o le First Methodist Episcopal Church, ma le First Baptist Church. O afiafi uma lava pe a manava Muti, e auai atu ai i fono tatalo i malumalu.

O le First Baptist Church na fetau ai ma "Mother" H. Philips, o se tama'ita'i na ia tausia Muti ma avea o ia ma ana tama faale-agaga. O ina foi na feiloa'i ai ma Emma Revell, o le na avea mulimuli ane ma faletua o Muti. O le tausaga e 1857 na nofo mau totogi ai Muti i le fale o "Mother" Philips ma 'ai ai. Ma o taimi uma la te feiloai ai na avea ma avanoa e fautuaina ai Muti i mataupu tau talosaga atoa ma lona faatuatua. Na ia a'oa'oina foi Muti i mea tau le Tusi Paia ma tauloto fuaiupu o le Tusi Paia. Sa a'oa'o foi o ia i le faiga o a'oga a tamaiti ma lesona mo e ua liliu mai i le faatuatua.

E iai se faaolaola na pupuna a'e i Sikako i le 1858, ma o "Mother" Philip sa auai i totonu o ia taumafaiga. Ua taufai tutupu a'e aulotu i talafatai o le taulaga, ma fesoasoani i le 'au le amana'ia o le aai, o le toatele o latou o le 'au inu 'ava, ula fualaa faasaina ma le 'au talitane.

Pei lava ona avea "Mother" Philips ma tina faale-agaga o Muti, na faapea foi ona avea J.B. Stillson ma ona tama faale-agaga. Sa faia le galuega a Stillson i seila o vaa i le Vaitafe o Sikako, ma ina ua feiloa'i ma Muti, na vave lava ona masani le isi i uiga o le isi, e tai uiga faatasi. Na ave Muti e Stillson e galue i vaega o le aai e fefefe fafine e o iai. O Stillson na ia tuu ia Muti le kopi o le tusi a George Muller: "A Life of Trust", o se tusi na matua aafia ai ona talitonuga mo tausaga e tele mulimuli ane.

mai le tusi: "God's Generals" tusia e Roberts Liardon, faamatalaina e Afemata Apelu Aiavao

ITULAU MO TUPULAGA TALAVOU

Ua Fiu e Sasa le Asini e le Usita'i

Numera 22:28: *Ona faagaganaina lea e le Alii o le asini, i le ua fai mai o ia ia Palaamo - se a se mea ua ou faia ia te oe, ua e sasa faatolu mai ai ia te au?*

Ua iloa e le asini a Palaamo le mea ua le iloa e lona matai, ma nofo ifo ai i lalo i le ala ua le usitai i lona matai, a ua usitai i le Atua. Ona tautala ai lea o le asini i le feau na ia maua mai le Alii mo le perofeta ina ua uma ona sasa faatolu o le asini ae ua le usita'i e savali i luma. Ae o le le usitai o le asini na avea ma mea e faasaoina ai le ola o Palaamo.

Se tausaga ua mavae na alu ai se a'egamauga a se perenise ma ni ana uo se toatolu. Na toto mai se matagi 'aisa, ona le usitai ai lea o le asini na latou ave, e toe savali. Ua fiu lava i sasa ae tutetee ma faauamalo le asini. Na maua atu le vaega lea e se isi 'au a'emauga ma latou iloa ai, toe lava o ni nai laa i luma a le asini na sasa, faapea ma latou e toatolu na iai, i le pa'u'u i se tofe tele ma feoti ai. Ana sasa atu le asini ma usitai, ua tupu le mala. O le mea moni, ua faasaoina latou e le asini.

Sa ola a'e i Egelani i ni tausaga ua te'a, se fafine ua oti lana tane, ma sana fanau teine e toatolu. O le galuega a le tina sa fai e tausi ai ia ma le fanau laiti, o le faigaluega tavini i se isi aiga maumea. O se tasi aso, ua leai sa latou falaoa, ona

tootuli ai lea i lalo o le tina ma tatalo i le Alii, "Le Alii e, a maua mai lava na o se falaoa ma si au fanau, ua lava lea, ae le afaina a'u."

E lei umi ona tatalo le fafine, ae tu'itu'i mai se faifalaoa i le faitoto'a ma fesili mai, pe manao i ni falaoa. Na tali iai le fafine, "Leai faafetai tele lava." O le mafuaaga na tali ai faapea le tina, ona na musu e aitalafu se falaoa aua e leai sa na tupe o iai e totogi ai. Ona sasa ai

lea o le taavale solofanua a le faifalaoa i le isi auala o le aai. Ae te'i ua 'e'e le solofanua ma liliu ua toe tamoe i le fale o le fafine ua oti lana tane, ma tu ai i lumafale. Ona toe tu'itu'i ai foi lea o le faifalaoa i le fale o le fafine ma lana fanau. A o le tali lava e tasi na aumai e le fafine. Ona toe sasa ai foi lea le taavale solofanua a le faifalaoa i le isi itu o le aai. Ae ua toe 'e'e foi le solofanua ma tamo'e i le fale o le fafine ma lana fanau. Toe tu'itu'i foi lea iai le faifalaoa ma fai atu i le fafine, "Ua faatolu ona sau la'u solofanua i lou fale. Ua ou le malamalama pe aisea. Ua sefulu ma le lima nei tausaga talu ona ou maua le solofanua lenei, ae o le faato'a faapea lava lea o lana amio le le usitai ia te au. O le mea lea, o le a avatu uma ma oe falaoa o totoe o la'u tiliva."

Ona la'u atu ai lea o falaoa ma isi meaai o le tiliva a le faifalaoa i le fale o le fafine ua oti lana tane, e tuu ma ia ma lana fanau ae le totogiina.

Rosa Mumu mo La'u Manamea

mai le itulau muamua

ma aiga. E pei o lona toe fia a'oga tusitala (journalism), poo lona auai foi i ni atiinae tau tamaitai. E tele lava ina ou tali i lona mana'o i lo'u oso i lo'u ita. Aua o lea e iai la ma fanau e leai se isi ua tuua le ofaga. E tatau ona nofo ia i le fale ma vaai tamaiti se'i matutua. O mea o loo mana'o iai Simoe, o lo'u toalua lea, e faalavelave i lo'u olaga ma mea ou te manao iai. E tele ni masina o ou tetee pea i mana'o o lo'u toalua, seia oo i se aso mulimuli ane, ona ou lagona ai lea, e tatau le mea o ia finau mai ai pea. Ua ou mautinoa, ou te le o tetee ia Simoe, ae o loo o'u tetee i le Atua ma lona finagalo mo Simoe. Ua ia tuu lea miti ma se faamoemoega manino i

le mafaufau o Simoe na te tulituliloa aua se manuia o lo ma aiga, a o lea lava na o lo'u tapunia o le faitoto'a.

Ua oo nei ina ou manao ou te fesoasoani e faataunuu mana'o o Simoe. Ua ou manatua foi le tele o masina o o'u te'ea pea ona manao. Ma e pei lava e tatau ona ou faia se mea e toe faafiafia ai Simoe, ona o lo ma feteena'i pea i ia aso e tele sa taumafai mai ai.

O le isi aso, a o iai i le potu o fai ai le a'oga a le porofesa o mea tau i alii ma tama'ita'i i ona po anamua, ma faiga sa faaali ai le alofa o le taule'ale'a i se tama'ita'i. Sa piilima ma faalagolago le faiaoga porofesa i le laupapa i luma o lana vasega ma faaali e faapea, 'O nei

faaauau itulau e 7

ITULAU MO TUPULAGA TALAVOU

O le Tausima'i a Simi i le Malumalu

mai le itulau muamua
'umi e le seleina, e alu atu i lona falesa i aso uma lava, e le umi ae toe sau i fafo. Ua tau masalosalo le faifeau i le alu soo o le tagata i le malumalu, aso uma lava e ulufale ai i le malumalu, e le umi ae toe sau i fafo. Faapea le faifeau, poo le a lava le mea e mafua ai

ona alu soo le tagata i le falesa, ae na o ni nai mimute, ae toe sau i fafo.

Ua popole le faifeau, ona e tele mea aoga ma le taua o loo teu ai i totonu o le falesa. E le taumate o la'ula'u e le tagata lea i lona fale. Na fesili iai le tamaloa na te tausia
faaauau i le pito i luga

Rosa Mumu mo La'u Manamea

faaauau mai le itulau e 6
aso ua pala'a'ai tama e faaali so latou faufaulofa i teine e pei ona fai e taulele'a i ona po anamua.' Fai mai o ia o se mea matua lelei lava lea i ona po anamua, a ua le toe faia i nei aso.

O le taimi lea na taufai alalaga mai ai teine o le vasega, 'E moni a oe, polofesa. Ua matamumuli e aumai i luma o tagata so latou alofa mo matou!'

O le taimi lea na ou ulu atu ai i le potu, e aunoa ma so'u tu'itu'i i le faitotoa, ma ou savali atu i le ogatotonu o le potu i le mea o nofo ai Simoe, tuu le teu fugalaau o rosa mumu i luga o lana laulau, ma ou punou ifo ma ou musumusu i lona taliga, "E ese lo'u alofa ia oe!" Ma ou sogi i lona alafau. Ae na o le sioa o le polofesa a ua patipati le vasega.

Ua tuu le vasega a le polofesa ae fesili ia Simoe, "O lou aso fanau lenei?"

"Leai!"

"O le aso na lua faaipoipo ai?"

"Leai!"

"A o le a?"

"Ai lava o le fia faaali mai o lona alofa ia au i le teu fugalaau rosa mumu."

Ua leva masina o ou tetee pea i le manao o Simoe. Ma e na ou manao e faaali i luma o lana vasega, e alofa lona toalua ia ia."

tusia e Bill Farrel

faamatalaina e

Afemata T. Apelu Aiavao

**When you know what you want, and
you want it bad enough, you will find
a way to get it.**

ma leoleo le falesa pe o le a lana mea e fai i le falesa e mafua ai ona alu soo i totonu. Ae fai mai lana tali, "Ou te alu ou te tatalo."

Fai mai le leoleo fale, "Oi se ta'u mo'i mai le mafuaaga e te alu soo ai i totonu o le falesa. Aua ua ou matauina, pei lava e le atoa se minute e te ulu ai i totonu o le falesa, ae e toe sau i fafo. E le puupuu faapena ni tatalo a tagata e fai i le falesa."

Fai mai le ulu ve'uve'ua, "Ia, vaai oe, ou te le iloa fai ni tatalo 'u'umi, e puupuu lava la'u tatalo. O aso uma lava pe a ta le sefulu ma le lua, na ona ou sau lava, o'u tu ma ou faasaga i le pulelaa, ma ou faapea, 'Iesu, o a'u o Simi. Lea ua ou sau!' Ona ou tutu laitiiti lea mo sina minute, ona ou toe sau ai lea i fafo ma le falesa. O la'u tatalo e puupuu lava; e le umi. Ou te le iloa fai ni tatalo 'u'umi. Ae ou te talitonu, o loo faafofoga mai iai le Alii.'

Ina ua manu'a Simi i se faalavelave faafuase'i i se isi aso, ma ave ai i le falema'i, na mata'utia le faafiafiaina o le 'au mama'i i uiga o Simi. Talie ma talanoa fiafia i tala a Simi.

Fai mai le teine tausima'i, "Simi, fai mai le 'au mama'i, na o lo latou talie i le tele o au tala malie. Fai mai e te fiafia lava oe i taimi uma."

"Ioe, ou te fiafia lava i soo se taimi. Taimi uma. Vaai oe, e mafua i la'u asima'i. E sau lava i aso uma ma faafiafia a'u."

Fai mai le tala a le teine foma'i, "O lau asima'i? Ae ou te le'i vaai lava o sau se isi e asi maia lou ma'i." O le mea moni, e le'i vaai lava le 'nurse' o sau se isi e asi maia le ma'i o Simi. E ta'oto'oto lava na o ia i lona moega i aso uma, ma e foliga mai e leai se aiga o le ulu ve'uve'ua.

faaauau itulau e 8

O le Mafuaaga o le Pese While Shepherds Watched Their Flocks

O le pese leni e mafua mai i ni tamalii se to'alua na iai ni o la faafitauli tau tupe. O Nauma Tate (Nahum Tate), na fanau i Dublin i le tausaga e 1652. O lona tama o se faifeau na faaigoaina e tagata ia Faithful - Rev. Faithful Teate. Ina ua uma lana a'oga i Trinity College i Dublin, ona alu ai lea o ia ma nofo i Lonetona ona o lona mana'o e fia avea o ia ma tusitala (writer). E le'i faigofie le mea na ia mana'o iai, ma e na tuai ona faamanuiaina ana taumafaiga. Ae na oo lava ina tofia o ia ma *poet laureate* i le tausaga e 1692, o se tofiga e faia e le tupu mo se isi e tusitusi solo (poems) mo le aiga tupu. Sefulu tausaga mulimuli ane ae tofia aloa'ia o ia ma tusitala faasolopito. A o le faalavelave o le alii faifeau ia Teate, o lona le iloa vaai lelei ana mea tau tupe, ma sa fai lea ma mea e pologa ai lona olaga. Na oo lava ina oti ai o ia a o nofo taofia i se nofoaga mo i latou e tele a latou aitalafu i le tausaga e 1713.

A o le mea na lauiloa ai o ia o lona galue faatasi lea ma le alii o Nicholas Brady, ma la tuu faatasi ma lolomiina le tusipese: *The New Version of the Psalms of David* i le tausaga e 1696. Na toe lomina le tusipese lea i le tausaga e 1700 a ua faaopoopo iai ma nisi pese fou, e iai le pese leni: *While Shepherds Watched Their Flocks*. O loo faavaeina i luga o le tusi a Luka 2: 8-14. Ma o le pese Kerisimasi leni e sili ona pipii i manatu o loo tusia i le Tusi Paia.

O le isi tamalii o George Fredirick Handel, o ia na fatuina le fati o loo lauiloa ai le pese leni. Na fanau Handel i Siamani o se tagata e matua talenia i le musika. Na

taumafai lona tama e ta'ita'i ese o ia mai le fiafia i le musika, ae alu e ave tulafono, peitai e le'i mafai Handel. Na o le sefulu ma le lua ona tausaga ae ia tusia lana uluai musika muamua lava, ma e na ofo ai lava le 'au fai pese i le talenia o Handel i mea tau musika, a o lea o loo itiiti lava o ia. Na sii atu o ia i

Lonetona ma atili lauiloa ai o ia ma salalau ai tala o lona talenia i mea tau musika. Ae na amata fai ifo le fiafia iai o tagata, fai ifo ai le tele o ana tupe maua mai mea tau musika, ma gau ai lana pisinisi. Ae o lana pese ta'uta'ua o le "The Messiah" na lavea'ia o ia, ma toe lapo'a ai lana teuga tupe.

E mata'utia lava nei tamalii e to'alua - o Nahum Tate, ma George Frederick Handel - na tusi e Nahum upu o le pese, ae fai e Handel le fati e matua fiafia tagata e pepese ai i lea Kerisimasi ma lea Kerisimasi i ia tausaga e tele ua mavae.

While Shepherds Watched Their Flocks

While Shepherds Watched Their Flocks by Night, all seated on the ground, The angel of the Lord came down, And glory shone around, And glory shone around.

"Fear not!" said he; for mighty dread Had seized their troubled mind, "Glad tidings of great joy I bring, To you and all mankind, To you and all mankind.

To you in David's town, this day is born, of David's line, The Savior who is Christ the Lord, And this shall be the sign: And this shall be the sign.

All Glory be to God on high, and to the earth be peace. Good will hence forth from heaven to men. Begin and never cease. Begin and never cease

O le Asima'i a Simi i le Malumalu

mai le itulau e 7

Tali Simi, ma ona mata fe'emo'emo'a'i fiafia, "O aso uma lava. Ioe, o aso uma lava pe a ta le sefulu ma le lua, e sau ai la'u tausima'i ma tu mai i vae o lo'u moega. Ou te vaai atu o tu mai ma fai mai ia a'u, "Simi, o Iesu! Ua ou sau e asi mai lou ma'i. O a mai oe i leni aso?"

I will lie down
in peace and
sleep, for you
alone, O Lord,
will keep me
safe.

Psalm 4:8

Ia Outou Talia le Agaga Paia

mai le itulau e 2

tulou, na maliliu ai lava i atunuu ese, ona o le Tala Lelei. Na molimau le Susuga Latu Latai, i lana pepa:

“O le uluai galuega faamisionare a Samoa i motu o Vanuatu, Niu Kaletonia ma Motu o Laotiti, o se galuega e pei ona lauga ai Ioane Viliamu sa faatali mai ai noanoaga ma puapuaga. I le 30 tausaga sa galulue ai Samoa mai le 1839 seia oo i le 1869, e onosefululua ulugalii Samoa sa galulue ai. Mai lea aofaiga, pe a ma le luasefulu fa faifeau, sefulu faletua ma fanau e to’aiva sa faamauina lo latou maliliu ai.

E ui o ia puapuaga ma sauaga, o fita ma faigata sa feagai ma Faifeau Misionare, ma nai o latou aiga, ae sa le faatafa ai ona o le momoliga o le finagalo pa’ia o le Atua. O lea ua tatou lagona faatasi ai le fiafia, le olioli ma le mitamita i o tatou loto, ina ua latou faailoa atu i le lalolagi le aao mafola, le aao lavea’i, ma le aao Faaola o Iesu Keriso.

Manatu e 3: Ona toe fetalai atu lea o Iesu ia te i latou, “Ia outou manuia. Faapei ona auina mai o a’u e le Tama, e faapea foi ona ou aauina atu outou.”

O le faamanuia a le Alii o Iesu Keriso i ona soo, o se aga masani lava o le aganuu faa-lutaia pe a feiloai. Ae ona ua faalua iinei ona faamanuia mai le Alii, ua mautinoa ai le taua tele o lona ausoo i lona finagalo. Aemaise o le galuega faaauau o le auina atu i ai i latou.

O le ata lea ua maua iinei - O se Ta’ita’i ua toe faamausali lo latou sootaga ma ona soo. O le au soo ua toe faafo’isia le tumu o le faatuatua, ina ua faamanuia mai lo latou Ta’ita’i. O lea ua mautu mai le Tala Lelei i la tatou Ekalesia, e

ala mai i misionare, aemaise o nai o tatou lava tagata Samoa faatuatua, na fai foi ma misionare ma auina atu mo le Tala Lelei. E oo mai i nei ona po, matou te manatu - o loo gafa pea le ‘Ekalesia Faapotopotoga Kerisiano Samoa, ma le Auina Atua lea na fetalai iai Iesu. E le ina ia faamautu le Tala Lelei, ae ina ia mautu atili le Tala Lelei, e ala i le Atamai i Gagana, aemaise la tatou lava gagana Samoa. O le upu moni lava, o loo moomia pea e tupulaga o le Ekalesia le saga a’oa’oina o le gagana, o tu ma aganuu aua le Tala Lelei; aemaise i tupulaga talavou i fafo atu o Samoa, e aofia ai ma Hawaii. O le una’iina o ni galuega lelei, ma le faaolaola i le gagana e le Ekalesia, e ono fesoasoani tele.

I sa matou suesuega na faia, na fulisia lava tupulaga i le faaaogaina pea o le Gagana Samoa i tapuaiga ma sauniga i AsoSa. Tau lava ina faamalamalama foi i sina faa-Peretania ina ia latou iloa le fe’au o loo fia momoli mai. E fulisia foi ina ia faataua pea Tu ma Aganuu a Samoa, aua o lo latou faasinomaga lea mai le Atua. Pau lava o lea, ia maua le onosa’i e le ‘au matutua e faamalamalamaina ai i latou. Aua o se lagona e ootia tele ai le loto, ina ua ta’ua o latou o Samoa, a ua vaivai le faatino i le tulaga tonu faa-tagata Samoa. E le o se upu avane ai, le gapatia pea o si a tatou Ekalesia i le faamautuina ma le faamamaluina o le faa-Samoa. O le gagana tautala ma le faamaumau, o tu ma aganuu faatino, na pei lava o ni mea pa’ia i tuua ma auga tupulaga ua tuana’i. Atonu sa o latou talitonu lava, o le faamanuiaga mai le Alii le gagana, e tatau ona a’oa’oina lelei ma faapelepele iai, aua le Tala Lelei.

Upu Faaiu:

E le taumasina so matou lagona, ma se tofa i le Ekalesia. A ua na o se tuualalo a tupulaga mai Hawaii. **“O Tupulaga - o le Auina Atua a le Ekalesia.”** E auina atu mo le Tala Lelei, ma le faaauauina o fe’au a le Ekalesia i le lumana’i. E tatau ai ona auina atu ma le Atamai, ma le Lototele, ma le Manuia, i le Ola Fou faale-Agaga.

E moomia pea ni sootaga lelei o faamanuiaga mai i Ta’ita’i o le Ekalesia mo ana tupulaga, ma ia faatumauina pea le Ekalesia i lona tofi - o le a’oa’o atu o le gagana. Ina ne’i faavaivai, ona milosia faatasi lea o tupulaga, i le malolosi o le mau gagana o nei onapo, i le faainitaneti ma le atamai faatekonolosi.

O loo faamauina foi e Ioane le tula’i o le Alii Toetu i le ogatotonu, ua manava atu ma faapea: **Ia outou talia le Agaga Paia.** Ioe, le Ekalesia e, o le Ola Fou lava lea ua manava atu i lona ausoo. E pei ona faaatoatoaina le tagata, ina ua manava iai e le Atua le manava ola i ona pogaiisu, ma maua ai le Ola Fou. Matou te talitonu, ua manava mai le Keriso o loo tulai pea i le ogatotonu o le Ekalesia ma ana tupulaga.

A taape lenei Fono Tele, ma fo’i atu i Usugafono uma, ia aveava lava o nisi ua Auina Atua ma le atoatoa i le Ola Fou, ma Faamanuiaga mai le Alii o Iesu Keriso, le Ao o le Ekalesia.

Soifua ma ia Manuia. Aloha!

O le tali filemu e liliueseina ai le ita; a o le upu faatiga e tupu ai le ita. O laulaufaiva o e popoto e faafiafia tagata i le poto; a o gutu o e valelea e luai mai ai le valea.

Faataoto 15:1,2.

Maria Lou

(O se tala mo Tupulaga Talavou)

O lo'u aso muamua i le vasega a Misi Hakorova, vasega fitu. Sa faigata ona ou amata i isi vasega na ou ui mai ai i lo'u olaga a'oga, o le mea lea na ou taumafai ai lava i le amataga ina ia ou talia ni uiga o le vasega fou ua ou iai nei. Na uma ona faafeiloa'i a'u e le faiaoga i le vasega, ona ou 'ata'ata ai lea ma ou nofo i lo'u nofoa ua faasino mai, ma ou manatu, e faatagataeseina nei au e tamaiti o le vasega ona o au o le teine a'oga fou faato'a ulufale.

Ae na faate'ia au i le taimi o 'aiga o le sefulu ma le lua, ina ua miomio mai teine i la'u laulau. Pisa fiafia mai ia a'u, ma faamatala mai le tele o mea o le a'oga ou te le'i iloa. Faamatala mai nisi o faiaoga ma o latou uiga, o nisi o teine a'oga ma a latou amio.

E le'i umi ae faasino mai teine leaga o le vasega, fia teine autu pe faasi'ugutua e le vasega. O Maria Lou English lona igoa. Ae a e fesili iai i lona igoa ae fai mai o Maria Louise. E tinoiti ma matamata ita ma le fiafia. O ona ofu e tuai ma le mananaia. E le aulelei i le vaai a isi teine, peitai ou te manatu lava au e aulelei, ae ou te le tautala iai i lea mea. E 'u'umi uliuli lona lauulu, ma tavi'ovi'o pito lauulu.

Ua leotetele lava le taumusumusua a teine e uiga ia Maria Lou, ae le vaai sa'o Maria i se isi. E savali mai i tafatafa o la matou laulau e vaai sa'o lava ae le tepa i se isi. E sisi i luga le isu. Na nofo i se laulau ma 'ai ai na o ia.

Ina ua tuua le a'oga ona fai mai lea o isi teine matou te o i luma o le falea'oga. Na ou fiafia lava ina ua taulia a'u i le kegi lea. Ua matou faatalitali. Ua ou le iloa pe o le a le mea lea matou te faatalitali iai. Ana ou alu sa'o lava i lo matou aiga o lelei, peitai e iai le lesona e tatau

ona ou maua.

Ua savali mai nei Maria Lou i le faasitepu o le falea'oga, o ona lima i luga o lana 'ato a'oga o loo faafafa i ona luma. Ona amata ai lea o faifaiga a teine - upu leaga, upu faifai, upu taufaaleaga. Ma nei lava mata faasia ia Maria Lou. Ua ou 'au atu fo'i iai ma a'u i taufaifaiga ia. A ou mafaufau atu iai, ou te le iloa poo fea e sau ai nei upu leaga ua ou faia. Ua faaoso nei a'u e isi teine ma faaauau ai lava taufaifaiga. Ua ou ta'ita'i nei i le kegi leaga. Ua ou tago atu ua se'i mai le 'ato a Maria Lou ma motu ai le ta'ita'i, ae pa'u i lalo Maria Lou ina ua ou tuleia. Ua alu le talie a teine ma patipati fiafia ona o la'u mea na fai.

Ae ua ou le fiafia! Ua ese pe lagona ua oso a'e i totonu o lo'u

mafaufau. Aua tu a'e i luga Maria Lou, aoao mai ana tusi a'oga ua salalau, leai se tala, leai se upu, ma alu. Na o le faasasa'o lava o lona tino ma savali ese atu, a o tafetafe ifo le toto i lona tuli na mafo'efo'e ina ua pa'u i la'u tuleiga.

Ua ou liliu ma matou o ma a'u uo ia sa faaoso a'u, ae ou iloa atu se tamaloa o tu i tafatafa o lana taavale. O ona foliga ma lana tu mai na ou mate'ia ai o le tama lea o Maria Lou. Na o le tu o le tamaloa ma faatalitali mai i lona afafine o savali atu.

Na ou ui atu i ona tafatafa ma ou vaai i ona mata, o faaalua ai le faanoanoa, ma le alofa i lona afafine ona o mea na vaai atu o fai iai e matou. Ua oso mai ia a'u le masiasi, ma ua ou toe ita i la'u mea na fai ia Maria Lou. Ma e le galo ia a'u mata alofa o le tamaloa i lona afafine, a o mafatia i upu leaga, ma taufaifaiga na matou fai ia Maria Lou. O se aoaoga tele lea mo a'u i aso e tele mulimuli ane.

\$50,000 mo le Faamama Toto

mai le itulau muamua

Tautiaga Senara FT, Sui Taitaifono Susuga Tunumoso Iosia Soliola FT, Failautusi Aoao Susuga Vavatau Taufao FS, le Teutupe Susuga Rimoni Wright FS, faapea ma ni sui o le Faalapotopotoga o le Faamama Toto (Kydney Foundation). O le fesoasoani masani lava lea e masani ona fai e le Ekalesia EFKS i tausaga uma.

O le Mafutaga Aoao a Tina e masani foi ona latou tuuina atu faameaalofa le \$50,000 i le Matagaluga o le Soifua Maloloina mo le togafitiga o gasegase o le atunuu. O ia vaega tupe e faifai pea i lea tausaga ma lea tausaga, vagana ai ua iai se faaletonu, poo se isi foi faafitauli e tulai mai, i mea tau tupe a le Ekalesia.

O tausaga uma foi e faameaalofa atu ai i le Nofoga mo

Tagata Matutua i Mapuifagalele le \$10,000 e fesoasoani ai ia latou foi galuga o le tausaga o nisi o le 'au matutua o le atunuu.

E faamanatu mai ai foi ia i tatou, mea taua o loo alu iai a tatou taulaga o fai i lea tausaga ma lea tausaga. Toetoe lava o le 50% o a tatou taulaga i tausaga uma e alu i le faagaoioiga o a tatou a'oga e fitu o loo iai, faapea tupe faameaalofa e pei o le \$50,000 Tala mo le Faamamatoto. Tatou te fai taulaga ai ma le loto malie, ma le loto fiafia, e faia nei fesoasoani mo e matitiva, mo e mama'i, ma le a'oa'oina o le toatele o nisi o fanau a lo tatou atunuu. O se tatou fesoasoani faatauvaa lea mo Keriso ma lana misiona na afio mai ai, o le faaolataga o ona tagata, ma lo tatou auauna atu i soo se tafa o ia faasino mai mo tatou.

O LE LAUGA

mai le itulau e 4

mautu o fale tetele lea foi ua matagofie le Iupeli. Iila ma feilafi vaega uma o lona tino mai. Ekalesia tele tupe faigataulaga e atia'e ai le Ekalesia. Ne'i o tatou manatu lea lava tatou te lelei. Ae aisea e tele ai faafitauli ua aliae mai i totonu o la ta ekalesia? Aisea? Ua fe'aina'i ai ua malepelepe o le a? Ua saili o le a i fogale malo ma faamasinoga se tali? 'Aua tatou te faamaualuluga. O le fetuleni mai o le anoano o faafitauli

feainai ekalesia. O le faailoga lea EFKS ua tatou lalata atu i le faitotoa o le malaia ua pogisa ma tauaso tatou mata faale agaga ma la ta galuega tala'i. O le lui lea ma le fafagu taua i le ekalesia, sei toe silasila toe tagai. Afai ua sese lau faafofoga ma lau faalogo. Afai ua lape ma femoumoua'i lo ta ola fesootai i le taitaiga a le Agaga Paia o le Atua pe le o le taua lea o le vaitau o le Agaga Paia. E tatalo ai – Faalogo i le Faasinoga a le Agaga Paia faamaoni seia oo i le oti. O

Iesu lava na fetalai o le afio ae o ia i le lagi. Ae auina mai lona Agaga Paia, e fai ma fesoasoani lau tou galuega. O le a la se isi taiala e toe sili? Taoto le alafua taua, lea lava ua saunoa ma fetalai le Alii toe tu. O le Agaga Paia o le Atua, e fesoasoani ma tautoalua i lau galuega paia o le Fono Tele a le Ekalesia Aoa. Aua nei faaseseina lau faalogo a ia usitai ma mulimuli i le Agaga Paia ona manuia lea.

Ia Manuia Tele le Fono Tele o lenei tausaga. Amene.

Fili Matalavea (FT) EFKS Faleula

Kerisiano Sauaina i le Lalolagi

(AD 2000 - Today)

mai le itulau muamua

latou, o le Sami Metiterani.

O lenei ata mata'utia na faate'ia ai le vaai a le miliona ma miliona o tagata o le lalolagi. Na o ni nai mimute mulimuli ane, ae faasalaina i latou uma i le oti, i le vavaeeseina lea o o latou ulu i pelu a le 'au faatupu faalavelave e tetei i le lotu Kerisiano, a o matamata mai iai le lalolagi i televise. O foliga na o le feoti faamaturu o le 'au Kerisiano i le senituri lenei 21.

O le aso 3 o Ianuari 2015 i le itula e 2.30 i le po i le aai o Sirte i Libya lea sa pulea e Ghadafi, na taufetuli atu ai ia tagata faaau'upegaina ma a latou pelu ma fana, ma tu'itu'i atu i faitotoa o fale o aiga, tatoso mai i luga tamaloloa ma tama o momoe, ma su'e lima poo taina ai faailoga o latou o tagata Kerisiano Coptic; o Kerisiano o le lotu e tele i Aikupito, o se atunuu Moselemu. E to'a 14 i latou na maua i le osofa'iga lea, ave i se nofoaga i Libya ma faafalepuipui ai ma isi na tapu'e muamua i le vaiaso ua mavae. I le aso 15 o Fepuari 2015, na faaoo ai le sala oti ia i latou e to'a 21, i le vavaeeseina lea o

o latou ulu i le pelu.

E faatutu lava sauaga i le 'au Kerisiano

O Kerisiano na tapu'e i le aai o Sirte ua tele vaiaso o galulue ai, ma lafo tupe o o latou totogi i o latou aiga i Aikupito. E matitiva tagata i nuu i tua o Aikupito, ma su'e gata ni galuega, o le mea lea e o ai le toatele i Libya e galulue ai i galuega e faavae i luga o le eliina o le suauu.

E le'i filifilia tagata ia e to'a 21 ona o latou o ni Aikupito, ae ona o latou o ni tagata e mulimuli ia Iesu Keriso, e iloa i faailoga e taina i o latou lima.

O upu o loo tusia i le video (ata TV) na faasalalau ai i le TV le fasiotiga o Kerisiano Coptic e faapea: "O tagata o le satauro, o e mulimuli i le lotu Aikupito e tetei"

O Aikupito na fai ma nofoaga o ni Kerisiano Coptic na amata mai lava i aso o le au aposetolo, 2000 tausaga ua mavae. O Mareko, o le na tusia le Evagelia a Mareko, e le taumate o ia lea na avea le Tala Lelei i Aikupito i le uluai senituri i taimi o pulega a Nero i Roma. Ma o Kerisiano Coptic e amata mai lava o latou talaaga mai ia Mareko i le uluai senituri. O Kerisiano Coptic Aikupito e tusa o le 15 pasene o le faitau aofa'i o tagata

Aikupito e to'a 80 miliona. Ma e tele ni sauaga ua oo i Kerisiano Coptic Aikupito - sauaga a le malo o Roma, sauaga a le malo o Take, sauaga i taimi o fetaua'iga a tagata Arapi lava latou, ma sauaga i ona po nei e pei ona tatou maimoa iai i TV. i tagata Isalama faatupu faalavelave.

E le faavasegaina lava e tagata Isalama faatupu faalavelave ni tagata; e fasioti lava soo se isi ma soo se tagata: o le tausaga e 2014 na vavaeeseina ai le ulu o James Foley, e le'i umi ni aso ae sosoo atu ai ma le tusitala (reporter) o Steven Sotloff. E fai lava le fasiga ae pu'e ma faasalalau atu i le TV.

Ae le'i tele ni tausaga ua te'a na fai ai se fasiotiga tele o ni aiga o tafafao i le aso malolo o Farani e ta'ua o le Bastille Day i le aai o Nice i Farani, e se tagata Isalama o 'avea se loli ma na osofa'ia ai nei aiga.

E tatau lava ona tatou malamalama, e iai le mafuaaga e ala ai ona faia fasiotiga tagata tetele faapea e tagata Isalama. O le vilivilita'iga lava o tagata Isalama faatupu faalavelave, o le fasiotiga o tagata uma e mulimuli ma talitonu ia Iesu Keriso, faapea ma soo se tasi o le faatuatuaaga Iutaia; ma soo se faatuatuaaga lava e faavae i luga o talitonuga faa-Kerisiano. Ma ua alia'e mai pea ia sauaga i

(E faaauau)

In You, Oh Lord, I put my trust. Let me never be put to shame.

Psalm 71:1

Aisea Ou Te Talitonu ai i Agelu

Ua lauiloa lava i nei aso le talitonu o tagata i agelu, ae le'i faapea i aso ua mavae. I ni nai tausaga ua te'a atu, e oo lava i le 'au a'oa'oina lelei e pei o se mea ese le talitonu o nisi o latou i agelu, poo le Atua foi.

Ina ua faalauiloa e Billy Graham lana tusi na faaigoaina "Angels", sa maoa'e lava le tele o le eseese o talitonuga o tagata e uiga i le tusi.

O a'u lava ia, e matua leai lava so'u masalosalo i le iai o agelu. Na tausaga a'u e "grandma", ma o ia na valiina le ata o le agelu le la e tautau i lona potumoe. Na ia tautauina foi i le puipui o lona potumoe le ata o le agelu tausi o loo fesoasoani i tamaiti o loo savavali i luga o le alalaupapa.

E matitiva lo matou aiga, ae a na faamatalaina le alalaupapa ma le agelu ma tamaiti o savavali ai, e pei lava o loo i le lagi. E pei o le taimi na ia vaai ai i apa'au o le agelu. Na ma'i, ma ua vaivai

ma o le a oti. Ma o loo fai a latou talosaga - o ana fanau, o le faifeau ma lona faletua, o loo tootuli ma tatalo faatasi ma grandpa. Na vili ia grandpa i le galuega e sau ona ua latou manatu ua lata ina i'u le ola o grandpa. Ae faafuase'i lava ona nofo a'e grandpa i lona moega ma fai mai, "Oi! se'i vaai! Tou te iloa atu?" O le agelu o le oti lea ua tuua le potu o grandpa.

E le'i umi ae taunuu grandpa mai lana galuega. Ua laga atu nei tamaiti ma fai ia grandpa ua toe malosi grandpa. Ae fai mai grandpa, "Ioe, ua ou iloa. A o sau la'u taavale na ou tatalo i le Atua ina ia toe aumai nisi tausaga se 15 e tausi ai outou e grandpa ona o lea tou te laiti.

Ua toe valivali ata ia grandpa ina ua malosi. O le isi aso na ou fai ai iai, "Grandma, vali mai sa'u ata o agelu." Ae tali mai i ona foliga fiafia, "Ou te le mafai ona fai."

"Aisea?"

"Aua e leai ni lanu faapea i le lalolagi."

I ni tausaga mulimuli ane, na faamatala ai se isi uso a Kerisiano e faapea, i se faalavelave na tupu na matapogia ai, fai mai a ia, "Na savali o ia i se fanua lafulemu e ola lauusi ai le mutia, o fuga mai ai fugalaa mananaia e le ma faamatalaina o latou lanu eseese. Ae le ni lanu e pei o lanu o loo tatou vaavaai atu iai i le lalolagi nei. E lanumoana le mutia, ae le o le tatou lanumoana e pei ona tatou vaavaai atu iai.

Ia, e sili atu i le 15 tausaga na toe faaopoopo e le Atua i le ola o grandpa. Ae o lea ua atoa lona 104 tausaga i le aso o tusia ai lenei tala.

Ioe, ou te talitonu i agelu. Ma e mafai ona ou tu atu i luma o i latou e tele lo latou poto na a'oa'oina, ma ou fai atu, ou te talitonu i agelu, ma le Atua. E le na o le talanoa ai o grandpa e uiga i agelu, ae na ia ola ai foi i le ituaiga olaga e le mafai ona tatou fesiligia ai, pe tatou te masalosalo i le agalelei o le Atua. Ma lona alofa na te tausaga ai lana fanau i le lalolagi nei.

tusia e Sharon Marshall

faamatalaina e

Afemata T. Apelu Aiavao

O le meaalofa a le Aferika mo le misionare agalelei

Na faamatalaina le tala, e le alii o Ioane Kalaka o le nuu o Katanga i Aferika e faapea, o ni taulele'a Aferika 'ave'avega i se isi aso, ua matua vaivai lava talu se latou savaliga mamao ma amoina a latou avega mamafa. Ua malolo ma oo ina momoe ai a o latou si'osi'oina se latou afi na tafu.

Ua oo ina pe le afi, a o le taimi lea o loo faapuna mai se liona e le mamao ma nei taulele'a, ma matau mai mea o fai e i latou. E le'i umi ae oso mai le liona ma faapa'u i luga o se tasi o taulele'a. Na te'i le tama ma 'e'e leotele, ma oo ina ala ai i luga isi taulele'a ma latou tulia le liona. A o le taule'ale'a na osofa'ia e le liona, ua matua lavatoto

atoa le tino i ona manu'a. Na saei e taulele'a se palanikeke ma fusifusi ai manu'a o le taule'ale'a na osofa'ia, ma latou aveina i le fale o se misionare e saili iai se fesoasoani. Na vave ona vevesi le misionare i le tau togafitiga o le tama manu'a.

Na matua ofo lava nei taulele'a ona e le'i tele ni aso na te'a ae toe malosi lelei lo latou uso, ona e leai ni ona ponaivi na gaugau i le osofa'iga a le liona, ma le lelei o togafitiga a le misionare.

Ina ua latou tuua le fale o le misionare, na savali atu le na osofa'i e le liona ma fai i le misionare, "O le a matou o, ae ou te toe sau i se aso lata mai."

Te'i le misionare i le isi aso, ua toe tu atu le tama lea na manu'a i le liona. "E te manatua a'u?"

Fai mai le misionare, "Leai!"

Tali le Aferika, "O a'u lea na e togafitia o'u manu'anu'a i le 'aiga o a'u e le liona. Ua matou o mai uma lo matou aiga, e avatu a'u, ma a'u ava uma, ma a'u fanau uma fo'i e to'a 60 mai a'u ava, ma oe e totogi ai lou agalelei ma lou togafitia lelei o a'u mai le 'aiga e le liona. Lea ua tapena uma mai a matou mea, ma matou o mai tatou te nonofo ma fai au fe'au ma e pule ia matou, ma fai matou ma au mea totino."

Make sure the outside of you is a good reflection of the inside of you.

O E UA FAI'ILAGI LE FOLAUGA

Fainu'ulelei Tulatoa Aoe'e Mulivai Asi.

10 Aperila 1949- 27 Fepuari 2018

“ua le nofoia foi le nofoa o Tavita....” (1 Sam. 20: 25) O le aso 26 Iulai 2004, a'o faataotolia Fainu'ulelei Asi, i le ward 4 o le Taranaki Base hospital, na asia ai le gasegase o lenei tama, ma ia finagalo ai, e ala i le musumusuga a le Agaga, o le a faavaeina/faatuina le ekalesia EFKS i le aai o New Plymouth. Na taunuu lona faamoemoe, ina ua faatu aloaia le Ekalesia i le aso 11 Setema 2004. O lona uiga, e mafai ona faaupuina faapea, o Fainuulelei, o le mea faigaluega a le Atua, na valaauina, na te faavaeina le ekalesia, i lalo o le 'a'ao ta'ita'i o le Alii. O lea lava aso, na faauuina ai o la tofi tiakono, (*faatasi ma se tasi o tama ua maliu*) seia oo mai i le taimi na maliu ai.

O ia o se tasi o aiga faavae o le ekalesia. O le uluai failautusi a le aulotu, o le faipese, o le ta okeni, o le failauga foi i le va i fafo ma le ekalesia, le pulega ma le matagaluega. Ae paga lea, ua le nofoia le nofoa o Tavita, ina ua valaauina o ia e lona Matai.

O Fainuulelei, e mai le alalafaga o Solosolo ma Moataa. Na soifua mai o ia i le aso 10 Aperila 1949, ae na faamanavaina e le Atua ana feau i le aso 27 Fepuari 2018, ina ua feagai ma se gasegase faafuasei (heart attack). Na faaipoipo atu ia Soonalote Saunimaa o Papa Sataua i le aso 27 Iulai 1974 i Ueligitone, ma fananau mai ai o la alo e toa 4,(2

tama, 2 teine) ma fanau a fanau e toa 7.

O lona soifua auauna i le galuega, e faamuamua lana ekalesia, ae faamulimuli lona aiga. O se Tama, e le lagona se leo, ae leotele ana faatinoga ma ana galuega. E filemu ma agamalu ona uiga, e tusaafia toe agamalie, ae tumu i le faaaloalo. E faaaloalo i tagata uma, aua e tutusa tagata uma ia te ia, e faaaloalo tele i lona faletua, ae maise le faifeau.

Matauina lona le popole pe fefe i le galuega, aua o se aulotu toagaogao. E le popole i le toaitiiti o le au galulue, ae popole ina nei le faataunuuna lona valaauina, e atia'e le galuega. E mafai ona ou faapea, o se auauna, e aoga tele mo le galuega a le Alii.

E onosai, e faamalosi'au ana saunoaga, toe loto tele. O Fainuulelei, e leiloa tautala i le upu 'leai.' E ioe a ia i mea uma (He always says yes), aua e augofie lona finagalo. E faigofie ona manatu. E logomalie ana fautuaga. Na te faafaigofie mea faigata. Na te faamama foi mea mamafa. Na te faamalie ana saunoaga, ae affi mai ai lona faalototele i le galuega. E tausi faifeau ma fiafia e faitaulaga, ae maise lona fiafia i mea e fai, ma soo se faamoemoe e tautua ai lona Matai. O Fainuulelei, o le uluai usufono tiakono a lenei aulotu i faalagamaea a le ekalesia i Malua ia Me 2008.

O ona toe sauniga-le lotu faale-aiga (family service) sa faia lea i le 6 i le afiafi o le Aso Sa 4 Mati i le malumalu o St. James Presbyterian, ina ua maea ona auai lona sa, (tino maliu) i le sauniga lotu a lana lava ekalesia, sa faia i le St Chads church i le taeao o lea lava aso Sa.

Sa ou taitaia le family service ma saunia le upu faamafanafana. O le Susuga ia Lauafia Taula,(AOG)

sa faitauina Afioga Paia a le Atua, a'o le Susuga ia Mulipola Misikei-Taitai o le Ekalesia Metotisi Koneferenisi Niu Sila, sa saunia talosaga.

Matagofie molimau o lea afiafi, sa feagai ma alo ma fanau, ae maise aiganalua, o uo foi ma e masani, o lenei tiakono tamalii. O le Aso Gafua 5 Mati i le 10am, na faataunuuna ai lona toe sauniga. O le Susuga i le Toeaina o le Pulega Ueligitone i Matu-A'ufaga Faafia sa taitai i le sauniga. Sa ou faaulufaleina lona sa i totonu o le malumalu. O le failautusi o le Pulega- Meki Lauvi na feagai ma tatalo, a o le upu faamafanafana, na feagai ma le Susuga ia Elekana Mose Tuialii. Sa molimau Michael Asi, e fai ma sui o le fanau i uiga alofa ma uiga tusaafia ma le finafinau o lo latou tama. Sa faaopoopo foi le Afioga ia Leuluaiasi e fai ma sui o le aiga. O le faletua ia Soonalote, na ia liliua lea taeao faanoanoa, i le malie ma le felanulanua'i o lana molimau, i le la mafutaga ma le tama o le aiga, i ona uiga le gaoia ma le toafilemu, loto alofa., ma le ola tauivi, ona ou faaiuina lea o molimau, i lona soifua faale-agaga, o lana auaunaga, ma lona le fefe e faatino le galuega. Mae'a le sauniga, ona molimoli atu lea o lona sa i le Awanui Cemetery. Na ou faaiuina lona toe sauniga i lona oliolisaga e faavavau, ma faamavae atu ai i le pese ' Talofa uso e, tofaina oe...Tofa, tofa, tofa...'

'.....Amuia lea auauna, o loo valaau mai, ae o loo faapea ona fai.....' Faamaise le Agaga o le Atua i le tina ia Soonalote ma le fanau, faapea aiga ma le ekalesia e pele ia te ia .

Faafetai Milo. (FS)

EFKS New Plymouth-Taranaki

O E UA FAI'ILAGI LE FOLAUGA

Pouniu Nafō'i Iese Nafō'i

25 Iulai 1939-10 Ianuari 2018

O le alii tiakono o le EFKS i Tula'ele. Na soifua mai i le aso 25 Iulai 1939 ae malii i le aso 10 Ianuari 2018. O ona matua, o le tama o Nafō'i Kilisi Nafō'i o Lelepa. O lona tina o Sofine Seiuli o Safotu.

E to'afa ona uso ma le tuafafine e to'atasi. Na faaipoipo ma Siala Siona Wilson o Safotu i le aso 6 Fepuari 1965. E to'a iva le fanau, e to'aono tama ma teine e to'atolu ma le fanau tausi e to'alua. O fanau a fanau e 30, ma fanau a fanau a fanau e to'a valu.

Na aumau i lona afio'aga o Safotu ma uluai tautua ai i le tofi tiakono i le Ekalesia i Safotu. Ae ona o tulaga o lana galuega faa-faiaoga, na avea ai ma faiaoga o le aganuu ma le gagana Samoa i le A'oga Faafaia'oga i Malifa (STC), na siitia mai ai ma le aiga ma aumau i Apia nei. Na maua lo latou fanua i Tula'ele nei, ma nonofo ai poo le amataga o le 1988. O le 17 Iulai 1988 na aloa'ia ai lo la matafale lotu. Avea ma galue i lona tofi tiakono i le aso 26 Iuni 1989. O nisi o tofiga na galue ai i le aulotu: Taitaifono o le aulotu - 1992-1994; teutupe o le aulotu - 1995-1996; toe fai ma taitaifono o le aulotu - 1999; toe tofia e fai ma teutupe o le aulotu 2001-2005.

O se auuana e atagia i lona soifua lona faamuamua o le Atua. O lana ta'ita'iga faale-aulotu, na te le'i fia alu ese i le alafua na faataoto e tua'a na mua i malae i le galuega e faafoe le aulotu aemaise lona tino i fafo o le galuega. E to'aga i sauniga lotu ma lagolago e faamaopoopo le

galuega i soo se itutino, o le Aufaipese, Autalavou, A'oga Aso Sa, Mafutaga a Tina ma le tino o le aulotu i ana mafutaga eseese, e oo i le taliga o ni tofi lauga e gasolo mai e fiafia e auai e oo nei lava ua matua, e aifilifili ai lava i le au malolosi e ui ua vaaia lona tino vaivai ona ua matua.

O le tama e taua ia te ia le galuega a le faifeau mo lona aiga, ona e fiafia e valaau le faifeau ma lona to'alua mo se faiga lotu, o se ma'i ua te'a mai le falema'i, failele, se malaga sauni e o pe ua to'ai taunuu foi o lona aiga; se fanau ua manuia se taumafai i a'oa'oga poo le a lava, e talitonu i le taua o le faafoi o le viiga i le Atua, faatasi ma le faamanuiaga mo le aiga e ala i le faifeau ma le to'alua ua tofia e le Atua e fai ma ositaulaga i lona nuu ma lona aiga.

E pele le faifeau ma lona faletua ia te ia talu lona alofa faamaoni i le Atua e ana le galuega. E faamaoni ma galue mae'a, e tusaafia ma iloa le va nonofo ma isi leaga ua leva ona soifua ma tautua i aiga, nuu ma le Ekalesia. O le tootoo o le atunuu i fale ma fafo. O ia sa tu e fai ma tootoo o le aulotu mo le Aso, ia Tesema 2005 na faapaia ai le falesa ma le fale nofo o le faifeau. E lelei ma faaaloalo le gagana, na te silafia foi ala e fofo ai se faafilemu i ala o le filemu.

O lona tula'i mai i tulaga tofi eseese o le aulotu o loo atagia ai le faatuatuaga o le Ekalesia sa ia te ia i taimi o lona malos. Ui o lea ua finagalo lona Alii e valaau ia te ia ma faamanava ana fe'au. A o se fiafiaga sili ia te ia ona ua iai se tasi o lana fanau e fai ma ana taulaga aua le galuega tala'i a le Atua - le faletua ia Sulamai Iosia ua faatasia ma le alii faifeau o Okesaita Iosia FS, o loo tausi aulotu i le Matagaluega a Niu Sauelese i

Ausetalia.

O le aso 19 Ianuari 2018 na tuua ai e lana auuana le maota malii o Pa'u Sefo sa ta'oto ai mo le malumalu o le EFKS i Tulaele mo lona sauniga faale-aiga i le 4pm. Ta'ita'i o le sauniga - Faauga Mata'utia FT; Tusi Paia - Rev. Tupu Tanuvasa (Tausi Matagaluega Metotisi); tatalo Rev. Atinae Peni (Tausi Matagaluega Metotisi); lauga - Rev. Okesaita Iosia FS. O i latou uma lava o taulaga tagata a Pouniu ma le aiga mo le galuega a le Atua. Na molimau le toatele o le fanau ma aiga, e oo i uo ma aumea mamae. O pese o le sauniga na usuina lava e le aufaipese a Pouniu i Tula'ele.

Toe sauniga - aso 20 Ianuari 2018 - 9am. Na valaaulia le Pulega a Faleata i Sisifo mo lena sauniga. Ta'ita'i Faauga Matautia FT; Tusi Paia - Nouata Saifoloi ATN; tatalo - Iosefa Afutiti FS; lauga - Tautua Aurelio FS (failautusi o le Pulega) - Mareko 6:50.

Na molimau le tina ia Siona Nafō'i; sui o le fanau - Lavea Pese-ta Lua Nafō'i; sui o aiga - Lavea Ieti, Nafō'i, Tuli'au Pateta; sui o le Pulega - Tautua Aurelio FS (failautusi); faifeau aulotu - Faauga Mata'utia FT; EFKS Safotu - Tanielu Apineru FT. Na lagiina lava viiga o le Atua mo lona toe sauniga e le aufaipese a Tulaele. Ona faaii ai lea i lona oliolisaga tumau i lona aiga, sa ou taitaiina ma faatofa atu ai ia te ia i le pese faamavae a le 'au Kerisiano 268 - Talofa uso e, tofaina oe. Tofa! Tofa! Tofa! Tofa!.

Ia faamafanafanaina pea le tina ia Siona ma le fanau aemaise o aiga e le Agaga o le Atua.

Faauga Mata'utia FT
EFKS Tulaele.

O E UA FAI'ILAGI LE FOLAUGA

Pauga Ioane

Leuea

10 Iulai 1954-15 Novema 2016

Na soifua mai Pauga Ioane Leuea i le aso 10 Iulai 1954, ae valaauina e lona Matai i le aso 15 Novema 2016. Ua atoa iai le 62 tausaga ma masina e fa o lona soifua. O lona alalafaga o Matatufu, Lotofaga, Aleipata. O lona tamā o Leuea Ioane Kelemete a'o lona tinā o Uimaitua Leuea. Na faaiipoipo o ia iā Suimai, ma e to'alima o la alo, e to'a 4 tama ma le ui'i o le teine e to'atasi. O o latou suafa o Anthony, John Junior, George, Vincent ma Fa'atoe Judy Leuea. O fanau o fanau e to'a tolu, tasi sa maliu a'o pepe.

Na amata ona galulue Pauga ma Suimai i Niu Sila ona faimalaga mai lea i Purisipeni, Kuiniselani, Ausetalia ma galulue ai i le tofi tiakono i le tatou Ekalesia. O laua nei ma nisi sa faatuina le aulotu EFKS i Loganholme i le tausaga 2008. Na

valaauina a'u e fai ma o latou faifeau ma sa matou osi feagaiga ai i le Aso 21 Fepuari 2009. Sa galulue malosi le tiakono ia Pauga ma le faletua ia Suimai, seia o'o lava ina valaauina o ia e le Matai.

O se auuina e filemu ma e galue malosi. E le o se tagata e tele ana upu, ae galue punoua'i ma le fa'amaoni, auā le galuega a le Atua. E leai se mea ua le o'o i ai le auuina a Pauga –tiakono Ekalesia, Mafutaga Tamā, Aupaipese, Autalavou. Tasi leni o tamā, e matuā lelei lana taalo i le matou au kirikiti pe a fai ta'aloga fa'alepulega.

O Pauga o se tagata e tauivi pea ma e tumu i le fa'aaloalo i le faifeau. Ou te talitonu o Pauga sa leva ona gasegase ae aunoa ma se tala i lona aiga ma le aulotu. Sa faigaluega pea Pauga auā le tausiga o le aiga aemaise o lana Ekalesia. Faatoa tu'u lava e Pauga ona tiute ma auuina ona ua faataotolia i lona gasegase o le kanesa (cancer). "Amuia e ua oti, ua oti oi le Alii"

O lona Sauniga faaleaiga na ou taitaiina ma faia le upu faamafanafana. O lona toe sauniga sa taitaiina e le Toeaina o le Pulega a Logan, Ionatana Faaiuas, faatasi ma le lagolagosua a nisi o le aupaipese o le pulega. Ona matou faatofa atu lea i le Afioga i le Tiakono Pauga Ioane Leuea, i le sauniga i lona nofoagamau i Beenleigh Cemetery, ma faai ai i le pese faatofa a le Au-Kerisiano, "Talofa uso tofaina oe, ua sau le itupo e malolo." O upu a le Tusi: "Ua ou tau le taua lelei. Ua i'u ia te a'u le tausinioga. Ua ou taofi le faatuatua."

Manuia lau malaga Pauga. Saunia e le Atua sou nofoaga tumau i le ola e fa'avavau.

**Parataiso Afaaso FS
EFKS Loganholme,
Pulega Logan, Kuiniselani i
Saute, Ausetalia.**

**You have put gladness
in my heart.**

Psalm 4:7

ELENI TUMUTUMU

12 Setema 1958-9 Tesema 2017

O Eleni o le faletua o le tiakono. O ona matua o Matila ma Peleiupe Matila Kalati. Na faaiipoipo atu ia Tumutumu Asiasiga, ma e toa lima (5) o la alo.

O se tina e loto mauualalo ma mata fiafia i le tele o taimi, e o faatasi lava lana gaioi ma le 'ata i taimi uma e faatino ai ana galuega. Sa galue malosi e faamaopoopo lo la tofi e pei ona valaauina ai e le Atua. E auai i potopotoga ma tofiga a le pulega ma le matagaluega, aemaise foi o a latou sauniga faa-tina, e pei ona masani ai. Na faaee atu ia i laua le tofi tiakono i le tausaga e 2002, ma galulue mai ai loa. Sa le faigofie le

taumataina o lo la valaauina ona o vaivaiga e masani ai le soifuaga. E talitonu, o lona mataala, aemaise o lana tuualalo ma le faatua lelei, sa mafai ai ona tauasa mai i le tele o fita ma faafitauli e le gata o totonu o le ekalesia, aemaise foi totonu o lo laua aiga.. E fiafia e faatino lana tautua.

Sa galue foi o ia i totonu o le mafutaga a tina e faatino ona tiute fai ma faamaopoopo i soo se fuafuaga fai ma polokalame faagasolo e masani ai le mafutaga. O se tina galue malosi e pei ona matauina i totonu o lona aiga ma mea e fai a le aulotu. Sa matauina lona lagolago malosi i lona toalua ma le fanau aua le atinaeina o le aiga ma le tautuaina o le galuega a le Atua. E fiafia e malaga i le maketi i Apia mo le faatauina o fua o a latou faaeleleaga aua le


tausiga o le aiga aemaise foi o le Tala Lelei. E toaga i sauniga lotu ma fiafia i le tatalo.

Na faataotolia le tina ia Eleni ona o se gasegase faigata. Na saili solo se fesoasoani e le gata o le maota gasegase, ae faapena i taulasea Samoa pei ona masani ai le atunuu. Sa le faigofie lava lona gasegase. Na toe sii atu lona gasegase i Lalomanu, ae ua siliga tali i seu se fesoasoani. Na valaau ai lava le Atua i le tina ma faamanavaina ana feau i le aso 9/12/2017.


Na aumaia i tua lona tino maliu i le aso 22/12/2017. Na faia lava ona toe sauniga i le malumalu i Saleaamua i le itula 10:30 i le taeao. O a'u lava sa taitai, faatasi ma le fesoasoani o nisi o le aupaipese. Na faamomoloto

faaauau itulau e 16


O E UA FAI'ILAGI LE FOLAUGA



**Fainu'ulelei Tulatoa
Aoe'e Mulivai Asi.**



**Pauga Ioane
Leuea**



**Pouniu Nafoti
Iese Nafoti**



Eleni Tumutumu

mai le itulau e 15

molimau a le tama aemaise le fanau ona o le mafutaga mafanafana ua motusia; ona faaiua lea lona molimau faa-le-agaga, ona momoli lea o lona sa i lona oliolisaga tumau ma faamavae atu ai i le pese e masani ai le ekalesia...Tau ina faatele le viiga o lo tatou Atua i lou sao ma le auaunaga ia te ia, e ala i le Tala Lelei. Ia manuia tele le malaga Eleni

Saunia :
**Pati Vili
EFKS Saleaamua.**

**The fruit of the Spirit is love,
joy, peace, longsuffering,
kindness, goodness, faithful-
ness, gentleness, self-control.
Galatian 5:22**

'Aua ne'i te'a ma oe le alofa

Faataoto 3: 1-10: "Aua ne'i te'a ma oe le alofa ma le faamaoni, ia asoa i lou ua, ia e tusiai i le papa o lou loto. Ona e maua ai lea o le alofa ma le manuia lelei i luma o le Atua atoa ma tagata."

O le manatu faaleagaga o le aso - "Faailoga o le alofa faamaoni." O vaega tusaafia tuufaataasi o le amio a le tagata o meaalofoa ia mai le Atua, ua faameaalofaina ai le tagata. Ma e leai se isi ala e mafai ona aliali ma faailoa ai, nai lo le amio, o le tu ma le aga. E talitonu i le faia o le moni ma le faamaoni i le nonofo ai ma isi uso a tagata. O le tausiga o le va, i ala ua saunia e le Atua, e gaosi ai le nonofo lelei, ma le nonofo fealofani, e afua ina ua faali ma faailoa atu e le tagata ina ia malu ma tapui avanoa e aua ai le nonofo faauso.

O le valaau foi mo tagata uma lava ina ia mafai ona maua le faamaoni, maua le alofa ma le agalelei, e mafai ona faailoa atu i aiga, o uo, o faalapotopotoga ma le sosaiete o loo tatou nonofo ma auauna ai. O le valaau i le faamaoni, o le faaaliga lea o le Atua ina ia mafai ona iloa ma aliali atu mo tagata. O le faamaoni e tapasaina ai le tagata ina ia mafai ona tutupu manuia ma faamanuiaga a le Atua, mo isi, ona o le faiva o le faamaoni o le faatinoina. E faamaoni le Atua, o le ala

foi lea e afua ai ona manaomia i tatou e ola alolofa ma faamaoni i le Ekalesia a Keriso, ua valaauina ai i tatou.

Le Mamea Tuiletufuga Ropati
Ta'ita'ifono - Komiti o Tupe
(Sauniga amata o se Fono -
Komiti o Tupe)



FAASA'OGA

O le Sulu Samoa o Aokuso 2018 o loo sese ai le faaiua o le ua malui ia Laumata. O le suafa sa'o o: FAUMUINA SANELE FAATOINA **LAUMATIA**
E faamalulu atu ai i aiga.